

ԿԱՐԾԻՔ

ԻԳ.00.02-«Քաղաքական ինստիտուտների և գործընթացներ, միջազգային հարաբերություններ» մասնագիտությամբ քաղաքական գիտությունների թեկնածուի գիտական աստիճանի հայցման համար Մագդա Արմենի Արսենյանի «խորհրդարանական մշակույթի կայացման նախադրյալները Հայաստանի Հանրապետությունում» ատենախոսության մասին:

Մագդա Արսենյանի ատենախոսության թեման արդիական է և հրատապ: Հիրավի Հայաստանի Հանրապետությունում խորհրդարանական մշակույթի կայացման գործընթացի ուսումնասիրության անհրաժեշտությունը պայմանավորված է խորհրդարանի՝ որպես հանրային իշխանության գերակա ինստիտուտի կողմից նոր հումանիզմի սկզբունքների կիրառման և «անցյալ-ներկա-ապագա» եռաչափության հենքի վրա ապագային միտված գործառույթային արդյունավետության ապահովման հրամայականով:

Ատենախոսության հեղինակին հաջողվել է հիմնավոր վերլուծության ենթարկել խորհրդարանական մշակույթի տեսական հիմքերն ու վեր հանել վերջինիս քաղաքակրթական, արժեքաբանական ու ինստիտուցիոնալ չափումները, որոշակիացնել խորհրդարանական մշակույթի զարգացման ստատուս քվոն և ապա մշակել ապագային միտված (future-focused organizational culture) զարգացման ռազմավարություն՝ այն դիտարկելով որպես խորհրդարանական մշակույթի կայացման և ժողովրդավարական համախմբման հրամայական:

Ներկայումս, ՀՀ պետական կառավարման համակարգում, խորհրդարանական մշակույթի զարգացման կարևորությունը առավել ամբողջական լուսաբանման կարիք ունի և այս ոլորտի ուսումնասիրությունները սակավաթիվ են: Հենց սրանցով էլ կարող ենք պայմանավորել թեմայի արդիականությունը:

Մ. Արսենյանի թեկնածուական ատենախոսությունում հիմնավորված է թեմայի արդիականությունը, դրա հիմնական նպատակներն ու խնդիրները, աղբյուրների բնութագրերը, թեմայի գիտական ուսումնասիրվածության աստիճանը և գիտական նորարարությունն ու գործնական նշանակությունը: Ատենախոսությունում ներկայացված են նաև ուսումնասիրության տեսամեթոդական հիմքերը, հիմնավորված են ատենախոսության հիմնական դրույթները:

Ատենախոսության համար հիմք է հանդիսացել սկզբնաղբյուրների, ինչպես նաև տարբեր մասնագետների, վերլուծաբանների, հիմնախնդրով զբաղվողների գիտական հետազոտությունների վերլուծություններն ու աշխատությունները: Օգտագործված է տարբեր լեզուներով հարուստ գրականություն, ինչը լուրջ արժեք է հաղորդում աշխատանքին:

Հեղինակը պաշտպանության է ներկայացրել խորհրդարանական մշակույթի վերաբերյալ ժամանակակից տեսությունների առանձնահատկություններն ու բաղադրիչները՝ դիտարկելով վերջինիս կայացման նախադրյալները Հայաստանի Հանրապետությունում:

Առաջին՝ «խորհրդարանական մշակույթի ձևավորման իրավաքաղաքական ակունքները», գլխում համակարգված ուսումնասիրության է ենթարկվել խորհրդարանական մշակույթ եզրույթը՝ որպես քաղաքական և սահմանադրական մշակույթների փոխազդեցության արդյունք: Անդրադարձ է կատարվել «խորհրդանական մշակույթ» հասկացության էությանը, կառուցվածքին, գործառույթներին և ժողովրդավարական զարգացման տարբեր հետազոտ ունեցող երկրներում դրա զարգացման էվոլյուցիոն առանձնահատկություններին: Հեղինակը դիտարկել է «խորհրդարանական մշակույթ» և «քաղաքական մշակույթ» կատեգորիաների փոխազդեցությունը քաղաքագիտության մեջ կիրառվող քաղաքական մշակույթի բնորոշման հայեցակարգային մոտեցումների (կողմնորոշիչ-արժեքաբանական, վարքաբանական և ինստիտուտացիոնալ) շրջանակներում՝ նպատակ ունենալով պարզել խորհրդարանական մշակույթի քաղաքակրթական, արժեքաբանական ու ինստիտուցիոնալ չափումները և ապա նախորոշել

խորհրդարանական մշակույթի զարգացման այն մոդելը, որը կարող է արդիական լինել քաղաքական մշակույթի նույնանման փորձառություն ունեցող երկրների պարագայում: Հեղինակը վերլուծության է ենթարկել նաև «փափուկ ուժ»-ի սոցիալականացումը և վերասոցիալականացումը որպես ՀՀ խորհրդարանական մշակույթի ժողովրդավարացման հրամայական (էջ 17-55):

Երկրորդ՝ «խորհրդարանական մշակույթի կայացման արժեքաբանական նախադրյալները Հայաստանի Հանրապետությունում», խորագրով գլխում ուսումնասիրվել են ՀՀ խորհրդարանական մշակույթի ժողովրդավարացման հիմնախնդիրները և նախադրյալները նեոքաղաքականության համատեքստում: Դիտարկվել են հետխորհրդային երկրների, այդ թվում Հայաստանի Հանրապետության քաղաքական կերպափոխման գործընթացները: Համակողմանի վերլուծության են ենթարկվել նաև արդի քաղաքագիտության մեջ գոյություն ունեցող ժողովրդավարական վարչակարգերի որակական չափման տարբեր մոտեցումները: Այս գլխում ուսումնասիրության են ենթարկվել նաև խորհրդարանական մշակույթի սուբյեկտիվ և օբյեկտիվ չափորոշիչները ժողովրդավարության որակի գնահատման չափումներում: Ըստ հեղինակի նշված չափումներն ունեն կարևոր նշանակություն խորհրդարանի գործառույթային արդյունավետության գնահատման տեսանկյունից: Նշվում է, որ խորհրդարանի գործառույթային արդյունավետությունը պայմանավորված է խորհրդարանական մշակույթի ստատուս քվոյով, որն արտացոլում է պատգամավորների և խորհրդարանական ինստիտուտների վարքային մոդելները: Հեղինակը անդրադարձ է կատարել նաև Հայաստանի Հանրապետությունում խորհրդարանական մշակույթի ձևավորման պատմաքաղաքական առանձնահատկություններին: Առաջարկվում է ՀՀ խորհրդարանական մշակույթի էվոյուցիոն զարգացումը դիտարկել նախքան պետական ինքնիշխանության ինստիտուցիոնալացման և սահմանադրաիրավական կարգավորման ժամանակահատվածում՝ անդրադառնալով առաջին և երկրորդ հանրապետությունների սահմանադրական և քաղաքական մշակույթի փոռձառության ուսումնասիրությանը (էջ 56-93):

Երրորդ՝ «խորհրդարանական մշակույթի կայացման ինստիտուցիոնալ նախադրյալները Հայաստանի Հանրապետությունում», գլխում ուսումնասիրվել են հետխորհրդային իներցիան և խորհրդարանի դերի կերպավորումը ՀՀ պետական իշխանության ինստիտուցիոնալացման չորս ալիքների հոլովույթում: Վերլուծության են ենթարկվել կառավարման նախագահական, կիսանախագահական և խորհրդարանական մոդելները՝ անդրադառնալով դրանց առավելություններին և թերություններին: Հեղինակը ներկայացրել է նաև քաղաքական կոալիցիաների ձևավորումը որպես ինստիտուցիոնալ գործիք խորհրդարանական մշակույթի ժողովրդավարացման համատեքստում՝ նշելով, որ ժողովրդավարական վարչակարգերում քաղաքական կոալիցիաները ծառայում են որպես տարբեր քաղաքական ուժերի կողմից ներկայացվող շահերի և նպատակների համադրման ինստիտուցիոնալ գործիքներ: Որպես խորհրդարանական մշակույթի ժողովրդավարացման նախապայման նշվում է կուսակցական համակարգի կայունությունը: Հեղինակի կարծիքով՝ ՀՀ կուսակցական համակարգի ինստիտուցիոնալացումը և գործառության արդյունավետության անկումը պայմանավորված է ինչպես Հայաստանի երեք հանրապետությունների գոյության ժամանակաշրջանում ձևավորված քաղաքական մշակույթի առանձնահատկություններով, նրանց գործունեությունը կարգավորող սահմանադրաիրավական և օրենսդրական նորմերի ու դրույթների անկատարությամբ, այնպես էլ ՀՀ Սահմանադրությամբ երաշխավորված քաղաքական իրավունքների և ազատությունների հասարակության կողմից իրացման ցածր մակարդակով: Որպես իշխանության օրենսդիր և գործադիր ճյուղերի միջև փոխազդեցության արդյունավետության հրամայական դիտարկվել է նաև խորհրդարանական վերահսկողությունը: Այս գլխի վերջին հատվածում հեղինակը անդրադարձ է կատարել նաև խորհրդարանական ընտրանու և քաղաքացիական հասարակության սոցիալականացման խնդիրին խորհրդարանական կառավարման պայմաններում: (էջ 94-153):

Ատենախոսության նպատակը, դրան համապատասխան սահմանված խնդիրները և վերջիններիս իրականացման նպատակով կիրառված մեթոդներն ու գործիքակազմը ներդաշնակ են ու համակարգված: Կատարված ուսումնասիրությունները հնարավորություն են տալիս բացահայտել, տարբեր տեսանկյուններից արժևորել խորհրդարանական մշակույթի դերն ու նշանակությունը պետության քաղաքական համակարգում և հասարակության կյանքում՝ այն դիտարկելով որպես ժողովրդավարական համախմբման հրամայական, վեր հանել վերջինիս դերակատարությունը հանրային և քաղաքական կառավարման արդիականացման գործընթացներում, ինչպես նաև դրա կայացման համար խոչընդոտող ինստիտուցիոնալ և օրենսդրական բացերը, սոցիալ-հոգեբանական, սոցիոմշակութային գործոնները:

Ատենախոսության գիտական նորույթի առումով կարելի է առանձնացնել հետևյալ ձեռքբերումները:

«-ում ԽՄ-ի կայացման գործընթացի համատեքստում հստակեցվել է խորհրդարանական մշակույթ հասկացության գործառույթային դաշտը, դերակատարները և կառուցվածքը, ինչպես նաև ներկայացվել է խորհրդարանական մշակույթի նոր սահմանում: Տարբերակվել են ԽՄ կայացման գործընթացի՝ անցյալ-ներկա-ապագա եռաչափությամբ պայմանավորված և՛ արժեքաբանական և՛ ինստիտուցիոնալ նախադրյալները, որոնք հնարավորություն են տալիս բնորոշել մշակութային ստատուս քվոն՝ ժողովրդավարության որակի բարձրացման նկատառումներով ապագային միտված զարգացման ռազմավարություն մշակելու նպատակով: Հիմնավորվել է ԽՄ-ի՝ ժողովրդավարական անցման գործընթացում և՛ որպես բաղադրիչ, և՛ որպես նախադրյալ լինելու հանգամանքը: Այս առումով ուշադրության է արժանի ժողովրդավարության որակի գնահատման սուբյեկտիվ չափորոշիչների հայեցակարգը, որի ուսումնասիրությունը հնարավորություն է տալիս պնդել, որ անկախ կառավարման մոդելից՝ ԽՄ-ն արտացոլում է պատմական հիշողությամբ, միջերով, կարծրատիպերով և ավանդույթներով պայմանավորված հասարակության վարքային մոդելները: Հիմնավորվել է «-ում ԽՄ-ի կայացման

գործընթացում քաղաքական երկկողմ սոցիալականացման և վերասոցիալականացման միջոցով քաղաքական և քաղաքացիական հասարակության զարգացման և հզորացման անհրաժեշտությունը: ՀՀ-ում ԽՍ կայացման գործընթացում քաղաքականության դերակատարների հաշվետվողականության, քաղաքական պատասխանատվության ամրագրման և խորհրդարանի գործառնության արդյունավետության նկատառումներով կարևորվել է պակտի կնքումը որպես քաղաքական շահերի համադրման ինստիտուցիոնալ գործիք: Իրականացվել է 1995 թ. ՀՀ Սահմանադրության, դրա 2005 թ. և 2015 թ. փոփոխությունների, ինչպես նաև «Կուսակցությունների մասին» 2002 թ. ՀՀ օրենքի և «Կուսակցությունների մասին» 2016 թ. ՀՀ սահմանադրական օրենքի համեմատական վերլուծություն, որը հնարավորություն է ընձեռել վեր հանելու կուսակցական համակարգի կայացման օրենսդրական հիմնախնդիրները և ներկայացնել առաջարկներ՝ նպաստելով ինստիտուցիոնալ մակարդակում կուսակցությունների ներքին ժողովրդավարության զարգացմանը, կուսակցական համակարգի մասնատվածության կրճատմանը և գաղափարական հենքի ամրապնդմանը: Օրենսդիր-գործադիր ճյուղերի միջև փոխազդեցության որակի բարձրացման նկատառումներով իրականացվել է ՀՀ և ԳԴՀ խորհրդարանական վերահսկողության մոդելների համեմատական ուսումնասիրություն, որի շրջանակներում դիտարկվել են պետական բյուջեի մասին օրենքի նախագծի ընդունման և քննարկման ընթացակարգերը: Ներկայացվել են քաղաքական մշակույթի զարգացման շարժընթացով և տեղեկատվական հեղափոխությամբ պայմանավորված խորհրդարանի՝ նոր հումանիզմի սկզբունքների կիրարկման շրջանակներում հանրային իշխանության քաղաքացիավարացման անհրաժեշտությունը: Ուսումնասիրելով ՀՀ անկախության 28 տարիների ընթացքում քաղաքացիական հասարակության ինստիտուտների բազմակողմ դերակատարումը և այլն;

Ատենախոսությունն, անկասկած, ունի նաև **գիտագործնական նշանակություն**: Հետազոտության կիրառական նշանակությունը պայմանավորված

է արդի փուլում ժողովրդավարության ինստիտուցիոնալ կառույցների կայացման և զարգացման, հասարակության-իշխանության միջև առկա և խորացման միտում ունեցող անջրպետի չեզոքացման, օրենսդրական դաշտի հետագա կատարելագործման վերաբերյալ առաջարկություններով: Հետազոտական աշխատանքի արդյունքները կարող են օգտակար լինել և ընդգրկվել քաղաքագիտության, պետության և իրավունքի տեսության, քաղաքացիական կրթության դասընթացներում: Հետազոտության մեջ կատարված առաջարկություններն ու եզրակացությունները կարող են օգտագործվել ռազմավարական նոր փաստաթղթեր ու ծրագրեր մշակելիս, օրենսդրական բարեփոխումներ իրականացնելիս և այլն:

Ատենախոսը տիրապետում և պահանջվող մակարդակով կիրառում է ինչպես ընդհանուր գիտական, այնպես էլ քաղաքագիտական և միջառարկայական **մեթոդաբանություն**: Մասնավորապես, ընդհանուր գիտական մեթոդներից կիրառվել են ինդուկցիայի, դեդուկցիայի, համեմատության, ինչպես նաև քաղաքագիտության համեմատական մեթոդները: Որպես հատուկ գիտական մեթոդ օգտագործվել է փաստաթղթերի բովանդակային վերլուծության մեթոդը: Համեմատական մեթոդի կիրառմամբ համեմատվել են հետխորհրդային պետություններում պետություն-քաղաքացիական հասարակություն գործակցության ընթացակարգերը, առկա մարտահրավերներն ու ձեռքբերումները: Աշխատանքում կիրառվել են նաև վիճակագրական, համակարգման և դասակարգման մեթոդները: Վերջիններիս կիրառմամբ դասակարգվել են ԽՄ լայն և նեղ սահմանումները, եզրահանգումները, ինչպես նաև արժեքաբանական և ինստիտուցիոնալ նախադրյալները ԽՄ կայացման գործընթացում: Դիսկուրս ուսումնասիրության ընթացքում անցկացվել են նաև հարցազրույցներ, որոնցից երկուսը տպագրվել են «Եվրոպական միությունը, Կենտրոնական Ասիան և Հարավային Կովկասը միջազգային հարաբերությունների համակարգում» (EUCACIS) միջազգային դրամաշնորհային ծրագրի շրջանակներում հրապարակված առցանց հանդեսներում:

Ատենախոսության շարադրման լեզուն և ոճը լիովին համապատասխանում են պահանջվող մակարդակին: Աշխատանքն աչքի է ընկնում հետազոտական հիմնահարցերի շարադրման հետևողականությամբ, հմտությամբ ու տրամաբանական հաջորդականությամբ: Համապատասխան խնդիրներ ձևակերպելու, դրանց համապատասխան մեթոդներ գործադրելու և համապատասխան եզրահանգումներ կատարելու՝ ատենախոսության մեջ դրսևորված մշակույթը վկայում է ատենախոսի գիտահետազոտական աշխատանքներ կատարելու՝ ձևավորված կարողությունների մասին:

Ատենախոսությունը զերծ չէ նաև որոշակի **թերություններից**, որոնցից հարկ ենք համարում նշել հետևյալները.

1. ատենախոսության գիտական մշակվածության համատեքստում, ցանկալի կլիներ, որպեսզի հեղինակն ուսումնասիրեր նաև այս ոլորտի այնպիսի հեղինակների, ինչպիսիք են Ա.Մելվիլը, Մ.Ֆաուլ, Ի. Վորոբյիի, Ա. Մալցանի և ուրիշների աշխատությունները: Նրանց գիտական ուսումնասիրությունները հատկապես արժեքավոր են՝ կապված հետխորհրդային երկրների քաղաքական կերպափոխումների, քաղաքական փոփոխությունների և քաղաքական զարգացման մասին ձևավորված պատկերացումների հայեցակարգային նորացման խնդրի հետ: Այս ամենից զատ, հետազոտությունն էլ ավելի արժեքավոր կլիներ եթե խորությամբ վերլուծության ենթարկվեր **«Օրենսդրական, իրավական, նորմատիվային ակտերը կոնկրետ խորհրդարանական մշակույթի ձևավորման, ազդեցության, դերի և նշանակության առումով («Սահմանադրություն, «ԱԺ Կանոնակարգ» «Օրենք, «Նորմատիվ իրավական ակտերի մասին» «Օրենք, «Ղնտրական օրենսգիրք):** Դրանց շնորհիվ հնարավոր կլիներ առավել հանգամանալից ուսումնասիրել **«խորհրդարանական կառավարման մշակույթի հիմնական առանձնահատկություններն ու դրա ունեցած նշանակությունը:**

2. Որպես գիտական նորույթ հեղինակն առաջարկում է ՀՀ ԱԺ-ին կից ստեղծել քաղաքացիական հասարակության ֆորում (էջ 14), սակայն բուն հետազոտության և հատկապես եզրահանգման մեջ հստակեցված չեն այս նոր ստեղծվող մարմնի կոնկրետ նպատակները և գործառույթները: Արդյո՞ք կարծում եք, որ «Թավշյա հեղափոխությամբ» պայմանավորված ԲՀԿ-ներ նվազ մասնակցություն ունեն հետհեղափոխական գործընթացներին:
3. Աշխատանքն էականորեն կշահեր, եթե հեղինակն անդրադառնար ոչ միայն Գերմանիայի, այլ խորհրդարանական կառավարման համակարգեր ունեցող մի քանի առաջատար պետությունների օրինակների ուսումնասիրությանը (Իտալիա, Ֆինլանդիա, Հունաստան, Սինգապուր, Իսրայել և այլն): Չնայած հետազոտության մեջ հետխորհրդային երկրների անցումային փուլին բնորոշ քաղաքական համակարգերի և ժողովրդավարության կայացման առանձնահատկությունների անդրադարձին, այնուամենայնիվ կարծում եմ պետք է վերլուծվեր նաև հետխորհրդային երկրներում կառավարման ձևերի տրասֆորմացիայի արդյունքում առաջացած թերությունները, արդյունավետության մակարդակը, զարգացման միտումները՝ համեմատելով դրանք մեր երկրի կառավարման համակարգի հետ: Այս ամենը կարելի էր ներկայացնել նույնիսկ առանձին ենթագլխով:
4. Ատենախոսության երկրորդ գլխում, անդրադառնալով հետխորհրդային երկրներում խորհրդարանական մշակույթի ձևավորման նախադրյալներին, ատենախոսն օգտագործում է զգալի քանակությամբ տեսական գրականություն: Հղում անելով քաղաքագիտության մեջ առկա տաբեր մոտեցումներին, տեսություններին՝ հեղինակը համեմատաբար քիչ է ներկայացրել սեփական դատողություններն ու գնահատականները: Մասնավորապես 78-80 էջերում անդրադառնում է խորհրդարանի գործառույթային արդյունավետության չափման մոտեցումներին(օրինակ Ա. Ֆիշի և Մ. Քոյնիգի կողմից մշակված խորհրդարանի լիազորությունների (Parliamentary Powers Index (PPI)) չափման ինդեքսը): Կարծում եմ

աշխատանքն էականորեն կշահեր, եթե հեղինակը հիշյալ մոտեցումներով իրականացներ ՀՀ խորհրդարանի գործառույթային արդյունավետության չափում՝ գնահատելով խորհրդարանական մշակույթն ու ժողովրդավարության որակը:

5. Վերոնշյալ ենթագլխի վերջում հեղինակն առաջարկում է ուսումնասիրված մոդելների հիման վրա դիտարկել խորհրդարանական մշակույթի ժողովրդավարացման ինդեքսի (ԽՄԺԻ) մշակման հնարավորությունը՝ հետխորհրդային երկրների անցումից դեպի համախմբում գործընթացների հիմնախնդիրների հաղթահարումը՝ որակապես նոր փուլ տեղափոխելու նպատակով: Դրական գնահատելով հեղինակի առաջարկը, կարծում եմ, որ աշխատանքը կշահեր, եթե հեղինակը սեփական վերլուծության արդյունքում՝ որպես գիտական նորույթ առաջ քաշեր ԽՄԺԻ մոդելի օրինակ՝ իրականացնելով չափում ՀՀ-ի օրինակով:
6. Կարծում եմ հետազոտությանը կշահեր, եթե հեղինակը, Դոնթի հայտնի բանաձևով, ՀՀ խորհրդարանում մանդատների բաշխման գործընթացի ուսումնասիրությունը, քանի որ այս մեխանիզմով մանդատների բաշխումը 2018 թվականի ընտրությունների արդյունքում հանգեցրեց մանդատների բաշխման անհամաչափության և խորհրդարանում ընդդիմության ձևավորման խնդրի: Հաշվի առնելով նաև հեղինակի կողմից՝ որպես միջազգային փորձառության լավագույն օրինակ ԳԴՀ խորհրդարանական կառավարման վերլուծությունը, (էջ 128, 138-141, 191) կարծում եմ կարելի է զուգահեռներ անցկացնել ԳԴՀ խորհրդարանի ձևավորման կառուցակարգերի հետ, քանի որ այնտեղ մանդատների բաշխումը տեղի է ունենում Հեյր-Նիմեյրի հայտնի բանաձրի հիման վրա:

Այս ամենով հանդերձ, վերը նշված թերությունները չեն նվազեցնում թեկնածուական ատենախոսության գիտական արժեքը: Հաշվի առնելով այս հանգամանքը, որպես 056 մասնագիտական խորհրդի կողմից հաստատված պաշտոնական ընդդիմախոս գտնում եմ, որ **Մագդա Արմենի Արսենյանի**

«Խորհրդարանական մշակույթի կայացման նախադրյալները Հայաստանի Հանրապետությունում» թեմայով ատենախոսությունը լիովին համապատասխանում է գիտության թեկնածուի աստիճան հայցելու ատենախոսություններին ՀՀ-ում գիտական աստիճանաշնորհման կանոնակարգի 7-րդ կետի պահանջներին, իսկ հեղինակն արժանի է ԻԳ.00.02-«Քաղաքական ինստիտուտներ և գործընթացներ, միջազգային հարաբերություններ» քաղաքական գիտությունների թեկնածուի գիտական աստիճանի:

Պաշտոնական ընդդիմախոս

**ԵՊՀ միջազգային հարաբերություններ ֆակուլտետի
հանրային կառավարման ամբիոնի դոցենտ,
քաղաքական գիտությունների թեկնածու՝ Է. Քալանթարյան**

**քաղաքական գիտությունների թեկնածու, դոցենտ Է. Քալանթարյանի ստորագրությունը
հաստատում եմ՝
ԵՊՀ գիտական քարտուղար, պատմ. գիտ. թեկն. ասիստենտ Մ. Հովսեփյան**

«06» դեկտեմբերի 2020

